

TE HEHEURAA API.

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E ui maitihia rá outou, e autahu'a arii, e nunaa mo'a, e feia hooia; ia faaite hua outou i to'na maitai, tei parau ia outou i to roto i te pouri, ia tae i to'na ra maramarama ume-rehia." 1 Pet. 2: 9.

Nu. 8.

10 Me, 1909.

Mat. 2.

Na te Ekalesia a Iesu Mesia i te Feia Mo'a i te Mau Mahana Hopea Nei, o te Noho i Raro A'e i te Hau Tamaru o Farani i Oceania Nei:

Ia ora na outou i te aroha o to tatou Fatu, ia Iesu Mesia ra, te tumu o te ora i teie nei e a muri noa'tu. Te papai atu nei ra vau i teie nei parau iti ei faaiteraa'tu ia outou na, e te mau taeae, e te mau tuahine, te Ekalesia, e tae noa'tu i te taata'toa o tei parahi i teie nei paeau fenua moana nei.

I na matahiti hoê ahuru ma maha i mairi a'e nei ua taa ê tatou. Ua haere ê atu vau i te vahi no reira mai hoi au. Ua oti hoi ta'u ohipa evanelia i ô nei, e ua parauhia, a haere mai, e ua haere ê atra. E teie nei, ua parau-faahou-hia hoi au e te peropheta. a haere faahou mai i te Ekalesia i ô nei. E na reira hoi au, e ta'u vahine, o Maria, e ta maua nei na tamarii toomaha ra. E i to matou taeraa mai, ua tupu to matou oaoa i te rahiraa. No te mea ua ite hoi matou e, ua tamau maite outou i te faaroo i tuuhia mai i mutaa ihora, mai te aueue ore, i te tiaturiraa a te

evanelia ta outou i faaroo a'e nei. Te reira te tumu i ho'i faahou mai â vau i ô nei, i rotopu ia outou na: ia ite outou i te Atua, e ia haapii e ia haapao hoi i ta'na mau ture, o tei ore anoihia i te mau parau faahuru-ê-hia a te taata nei. Aita hoi au i haere mai i imi i te hoê maitai no'u iho, no te mea ua hau to ô atu maitai. Aita hoi au i haere mai i imi i te tao'a o teie nei ao. Ua haapae-ê-hia na taua mau mea ra. Teie to'u hinaaro, ia noaa to outou paari e to outou ite, e to outou faaroo, e to outou maramarama, ia riro outou ei tamarii mau no to tatou Fatu i te ao ra.

Teie ta'u parau ia outou e te Ekalesia e, a faaroo papu outou, e ei haapao hoi. e ia ite outou aita roa to te haapii-raa e faufaa, aita hoi to te ite, e to te paari, e to te mana, e to te mau mea'toa e faufaa, maori râ ia haapao-atoa-hia te mau mea e haapiihia. E ua mauruuru hoi au mai te mea e, ei faaan maite outou i to outou haerea i to te Atua hinaaro, oia hoi ia aroha noa, eiaha e tama'i, ia haapao i te faito tia, eiaha e imi i ta te vetahi ê ia pau ra, ia parau haamaitai atu, eiaha ia hopoi i te parau ino. Ia na reira hoi outou, ei riro outou ei tamarii na to tatou metua i te ao ra.

E te hopea o ta'u nei parau, e au mau hoa e, ia ora na, ia maitai â, ia parahi ma te hau, e tia te Atua, no'na te aroha i rotopu ia outou.— VILIAMU.

“E oaoa i te fatu, eiaha e faaea, e parau fahou atu â vau, E oaoa outou. Ia itea to outou mârû e te taata atoa ra. Tei pihaiho nei te Fatu, Eiaha outou e ahoaho noa atu i te mau mea atoa nei; e faaite hua râ i to outou hinaaro i te mau mea atoa nei i te Atua, i te pure, i te aniraa'tu ma te haamaitai. E na te hau a te Atua, o tei hau ê atu i te ite taata nei, e faaitoitô mai i to outou aau, e to outou mana'o i te Mesia nei, ia Iesu. E teie nei, e au mau taeae, te mau mea haavare ore ra, te mau mea au maitai ra, te mau mea tia ra, te mau mea viivii ore ra, te mau mea popouhia ra, te mau mea roo maitatai ra, e haamana'o i taua mau mea ra.”
Phil. 4: 4 8.

O Iesu te Fatu no tei Pohe
e no tei Ora Moi

Ua tamata matou, e ua titau hoi e faaite atu ia outou i te ravea ta te Atua ra, i vai iho no te ora mure ore. E ua tamata atoa ra matou e iriti e e haapii atu hoi i te mau mea aano, te hohonu e te teitei no te ravea ta te Atua i faataa ia faariro i ta'na ra mau tamarii ei faito no'na ra.

E mea papu e te paari i te opuaraa a te Fatu, ia haamaoro ia oia i to tatou iho vairaa ora i roto i teie nei ao e te ao a muri atu, oia hoi na te Atua iho i tauturu mai ia tatou i roaa i te ora mure ore, hou to tatou taeraa mai i roto i teie nei ao i te paeau Varua, e te tauturu mai nei oia ia tatou i te paeau tino hoi, e e tauturu atu oia ia tatou ia tae atu i te ao â muri atu, ia faarue atu tatou i teie nei ao e ia riro to tatou nei tino e tino tahuti ore.

Ua papaihia e ua haapiihia hoi te parau no te ora mure ore, area râ i te mea ta tatou e hinaaro i teie nei, o tei parau i nia iho i taua mau parau ra, mai teie te huru, ua parau mai Paulo ia Timoteo na ô atura oia, "O te hinaaro i te taata atoa ia ora, e ia noaa i te ite e te parau mau." 1 Tim. 2: 4.

E ua parau atoa mai oia hoê hoi arai i ropu i te Atua e te taata. E no reira, na roto i to tatou faaora o Iesu Mesia, e faaora te Atua i te mau taata'toa ra. Inaha! e rave rahi i te milioni taata i pohe roa, i ore ratou i faaroo i te evanelia a Iesu Mesia ra, e te ravea hoi i noaa i te ora. Te pae rahi no te mau taata ra i fanau i roto i teie nei ao, aore hoi ratou i faaroo i teie nei ravea ta te Atua i tuuhia mai i te taata nei. E no reira e hau atu i te ohipa ra faaoraraa o te vai nei i te ao varua. E imi tatou i roto i te buka mo'a, i parau-faahou-hia mai ai e te aposetolo ra, na ô atura, "No reira hoi te Mesia i pohe ai, e i tia faahou ai i nia, e e tia hoi oia i te oraraa, ia riro oia ei Fatu no tei pohe e no tei ora hoi." Rom. 14: 9. E ua papu i to'na ra mana'o e

tae atu i ta'na ra ohipa i te mau taata i pohe, e no te feia e ora, no te mea ua na ô maira Iesu i te mau aposetolo, "Eiaha e maere i te reira; te fatata mai nei hoi te hora e faaroo ai te feia atoa i roto i te apoo ra i ta'na reo." Ioa. 5: 28. E faaroo te taata pohe i te reo no te Tamaiti a te Atua e na'na hoi e a'o atu i te evanelia i te mau varua parau-tia ore. O ratou, oia hoi te mau varua o tei faaroo i te evanelia, e e haapao ai i te reira, e rave ma te tamau i te ohipa e tae noa'tu i te hopea ra, e e tia faahou ai ratou ma te hanahana rahi. Area râ te mau varua parau-tia ore o tei patoi i te mau ture a te Atua, e tia mai ratou ma te haama e faahapahia ia, e pee atu ratou na te e'a pouri e te hara, e tae atu i te pohe mure ore. E no reira ia faaroo ratou i te evanelia, i to ratou vairaa parau-tia ore, e mea nehenehe noa ia ratou e farii e aore râ e ore e farii, mai te au i ta ratou hinaaro ra. Ua parau atura Iesu ia Mareta, o te mihi noa ia no te poheraa i ta'na taeae o Lazaro ra, ua na ô atura Iesu ia'na. "Tei ia'u te tia-faahou-raa e te ora, o te faaroo mai ia'u ra pohe noa oia e ora â ia." Ioa. 11: 24.

Teie te tumu ua faasataurohia o Iesu Mesia ra, ia a'o atu i te evanelia i te mau varua parau-tia ore, no te mea ua haapiihia te mau aposetolo, aore te hoê i'oa i raro a'e i te ra'i e tia te taata ia ora, maori râ na roto i te i'oa o Iesu Mesia. E no reira, i muri iho i te faasataurohia, oia hoi te taa-ê-raa no to'na ra varua, haere atu oia ei haapii i te evanelia i te mau varua parau-tia ore i Paradaiso ra. I na reira atu Iesu mai te mea ra e, te faaroo nei tatou i te Bibilia i a'o atu ai te Mesia i te evanelia e te parau oaoa rahi ia ratou ra, no te mea feia rave ino ratou, e ua hara ia i to ratou parahiraa i te paeau tino nei. E no reira, i tae atu ai i te evanelia ia ratou i te ao varua e tupu i te oaoa rahi i te mea ra e, e nehenehe noa ia ratou e farii mai te mea e faaroo to ratou. E iriti ai tatou i te parau a Petero, o tei parau mai e:

"I pohe nâ hoi te Mesia iho no te hara hoê poheraa, te taata parau-tia

no te feia parau-tia ore, ia tae tatou ia'na i te Atua ra, i taparahi-pohe-mau-hia oia i te tino ra, i faaorahia râ e te varua; o ta'na ia i a'o atu i te mau varua e vai i roto i te tapearaa i teie nei, o tei ore i faaroo i mutaa i hora, i te faaoromairaa roa i te Atua a tia ai i te anotau i Noa ra, i te tarairaa i te pahi ra, i ora'i e toofanu pue taata i te moana, oia hoi na taata toovau ra." 1 Pet. 3: 18-20.

Ua na reira atu oia i to'na parahi tino noa i roto i te apoo, hou to'na tia-faahou-raa i nia. I te rehurehu no to'na haereraa mai no te apoo, ua farerei oia ia Maria, i te na ôraa e, "Eiaha oe e tapea mai ia'u, no te mea aita vau i tae atu i to'u metua i te ao ra," area râ i parau atu oia ia Maria e, e mea fatata roa i te hora e haere atu oia i to'na metua i te ao ra. Ua parahi oia i na mahana e toru i roto i te ao varua, o tei pii atu i te mau parau no te tatarahapa i te mau taata ra o tei parahi i nia iho i te fenua ra i te tau no Noa ra.

I to tatou haapiiraa atu i teie, eiaha e mana'o e, e mea maitai paha e parahi faatau noa ra, e e rave i te mau huru peu ino e rave rahi, e ia tae atu i te ao varua ra, e tatarahapa i te mau mea iino i ravehia i te paeau tino ra. A hi'o na te mau varua i ore i faaroo i te parau no te pate-rearaha o Noa, ua tapeahia ratou ra e 2400 matahiti i te maoro i te vairaa i roto i te tapearaa, mai te diluvi e tae noa'tu i te tau no te Mesia, e 24 tenerere i te maoro to ratou vairaa i roto ra, e i raro a'e atoa hoi i te utua no ta ratou ohipa poiri, e to ratou mau hoa o tei rave i te ohipa maitai e te papu hoi, e haere noa i mua e i nia e tae atu ai i te ora mau. Ua na ô atura Petero:

"I parau-atoa-hia'tu ai hoi te evanelia i te feia i pohe ra, i faahapahia atu i te tino ra, te ora ra râ ratou i te Atua i te Varua ra." 1 Pet. 4: 6.

A hi'o tatou i te neheneheraa i te opuaraa tano maitai a te Fatu, ia imi i te ravea no te feia i pohe, o te ore i faaroo i te evanelia, e te ravea Ta'na i imi no ratou ra.

— SOLONA.

Ua haapono atu e 261,560,379 tone arahu mai ta fenua Beritane i te matahiti 1908.

E Auraro Tatou Atoa i te Feia Mana i Faatoroahia e te Mau e Tia'i

“Te faaroo nei matou e, ia aurarohia te mau Arii, te mau Peresideni, te mau faatere hau e te mau haava; ia haapaohia, ia faaturahia, e ia faatiahia'tu hoi te mau ture o te fenua nei.” Iosepha Semita.

“Ia auraro maite te taata atoa i te feia mana toroa ra, aore roa hoi e mana, maori râ no ô mai i te Atua ra.” Rom. 13: 1.

I te anotau i poro haere Iesu Mesia e te mau aposetolo i te evanelia, ua auraro maite ratou i te feia mana, e te titau aufau moni e tia'i. I te hoê mahana ra, ua tae mai te feia haaputu moni aufau ia Petero ra, na ô maira, “Te aufau nei anei to outou orometua i te moni aufau?” Ua na ô atura oia, “E, te horoa nei.” E te haere atura Petero i te fare ra, ua ui mai Iesu ia'na, na ô maira, “Eaha to oe mana'o, ei ia vai ra te hui arii o teie nei ao, ei titau atu i te moni aufau i ta ratou iho tamarii anei, ei ia vetahi ê anei?” Ua pahono mai Petero, “Ei te taata êê.” Ua na ô maira Iesu, “Ua tiamâ maori te tamarii.” Ua parau atu Iesu ia'na, “Haere i te pae roto ra, e taora'tu i te mātāu, a huti mai ai te i'a matamua i amura; a hahae i to'na vaha e ite ai oe i te hoê maa moni o ta oe ia, e hopoi atu ia ratou ra na taua atoa, oi inoino mai ratou ia tatou.”

Ua haapii atoa Paulo i te ekalesia ia auraro maite ratou i te feia mana e tia'i. Ua parau atu oia, “E tuu atu i te mea e au i te taata atoa, e tao'a aufauhia ta'na ra e aufau atu ia.” Teie hoi te huru o te haapiiraa ta Paulo i haapii atu ia Timoteo. “E pure, e ei ani hoi i te Atua e haamaitai i te taata atoa, te feia mana e te feia rii, ia parahi hauti-orehia ratou, ma te hau, ma te paieti, e te faaoromai, te maru e te aroha, e mea maitai hoi te reira, e te au i te aro o to tatou Atua.” Na ô atura Petero i te ekalesia, “Ia auraro maite outou, i te feia mana e te mau tavana ra, e feia tonohia, e tahoo atu i te feia i rave i te ino, ei haamaitai i te feia i rave i te maitai ra.” E tia ia ia faatura'tu i te taata atoa e aroha'tu i te mau taeae, e ia mâtā'u i te Atua. E eiaha outou e parau ino i to outou iho mau haava. E oia mau ia e na reira hoi tatou ia tanturu atu i te feia mana i nia iho ia tatou nei, ia riro te taata'toa ei taata maitatai e ia tupu te maitai i te rahiraa.

Te Maitai o te Feia e Tiaturi Atu i te Atua

“Te feia i tiaturi ia Iehova ra, e riro ia mai te mou‘a ra mai ia Ziona, e ore e arori ra, e tia ia i te vai-maite-raa. Mai te mau mou‘a ra e haaati ia Ierusalema ra, oia atoa Iehova i te haaatiraa i to‘na taata i teie nei, e a muri noa‘tu.” Sal. 125: 1, 2.

Te faaite mai nei Davida i te huru o te feia e tiaturi ia Iehova, Ua faaauhia ratou mai te mou‘a ra mai Ziona o te ore e aueue, e o te ore e hi‘a i raro. E tia ia i te vai-maite-raa, mai te mau mou‘a i haaati ia Ierusalema. Mai te reira atoa to Iehova haaatiraa i te feia i tiaturi ia‘na e a muri noa‘tu. O vai te feia i tiaturi ia Iehova? E rave rahi te feia i tiaturi ia Iehova, mai ia Noa i tiaturi i taua parau ra na roto i te faaroo i tei parauhia mai e te Atua i te mau mea aore â i itea. Ua tupu te mätä‘u o Noa ua tarai ihora i te pahi ia ora oia e ta‘na fetii i te diluvi, e ere anei? Ua ora oia e to‘na fetii na roto i to te Atua tia, e te haatiraa ia ratou. Oia atoa Aberahama na roto i te tiaturi i taua parau ra ma te faaroo. A parauhia mai ai oia e te Atua, haere i te hoê vahi a muri atu ei aia haere atura oia mai te ite ore i taua fenua ra, na roto i to te Atua tiairaa, e te haatiraa ua tae atura oia i te fenua to te Atua i fafau no‘na e to‘na atoa huaai, oia te fenua Kanaana.

Oia atoa Sadaraka, e o Meseke, e o Abedeneto, faauehia mai ai ratou e te arii taehae ra e Nebusaneta ia haamori i te tii i faatiahia e ana. Ua haamori anei ratou? Aita. No te aha? No te mea ua ite ratou e, e ere te Atua e faaora ia ratou, no te mea e mea hamanihia e te rima o te taata nei. Ua tupu atura te riri rahi o taua arii ra ia ratou, e ua parau atura i to‘na mau taata puai, a ruuru ia ratou i te taura, oia hoi na taata tootoru, a huri atu i roto i te umu auahi ura. Ua pohe anei taua mau taata ra? Aita. No te aha? No te mea ua tiaturi ratou i to ratou Atua o tei faaora ia ratou. O taua tiaturi ra, o te faaroo ia. E ua tiaihia, e ua haatihia

ratou e te Atua, e taua tiairaa ra, ua itea mai te tamaiti a te taata o te toomaha ia i te feia i hurihia i roto i te umu auahi.

Oia'toa Daniela. Ua hurihia oia i roto i te apoo o te mau liona, e ua fâ mai te melahi ei opani i te vaha o te liona, na roto i te faaroo e te tiaturi i roto ia'na. E ere anei te tia maite ra te Atua i Daniela? Na reira atoa i te anotau o Iesu e te mau aposetolo. Mai ia Petero, ua tapeahia i roto i te fare auri. Ua fâ mai te melahi ia'na, papai atura i to'na aoao atia i nia; ua tia a'era oia, e ua haere atura i rapae e tae atura i te opani aua e hamāmā noa ra, e ua reva atura mai te ite ore te taata e ite mai ia raua. E ere anei na roto i te tiairaa a te Atua? Oia'toa Paulo e Sila, ua tapeahia raua i roto i te fare tapearaa. Na roto i te pure e te himene i te Atua, ua hamāmā noa te opani o te fare tapea. E ere anei na roto i te tiairaa a te Atua? (Ohi. 16).

Eaha te huru o te feia aore e tiaturi i te Atua? Aore roa ia e haapuraa to ratou e rave rahi ra te ati e tupu i nia ia ratou. E roohia ratou e te mau hamani ino. No te aha? No te mea aore ratou i tiaturi, ua riro te mau mea navenave, te tao'a, e te moni, e te mau peu atoa ra, e i tia i ratou i teie nei ao.

Oia'toa i te poheraa o Iosepha i te 27 no Tiunu i te matahiti 1844. I muri a'era ua aratai atura Berikama Ioune e te mau aposetolo i te Ekalesia i te fenua i tohuhia mai e te peropheta ra o Isaia 2: 2-3; te fenua te reira ta te Atua i faataa e i faatiaraa i to'na fare i nia'e i te mau aivi. Ua tupu ra te ati, e te pohe, e te poia, e te poiha, e ua haere noa ratou mai te ite ore i te e'a, e tae atura ratou i taua fenua ra. E ere anei no to ratou tiaturi e te faaroo i te Atua? E te ite nei ratou i te huru o taua fenua ra, e fenua medebara i te pape rii, e te vahi repo mārô. E na roto i to te Atua tautururaa ia ratou e te hamani maitai ia ratou e te tia maite-raa ia ratou. Mai te reira hoi te faariro nei oia i te medebara ra ei pape hopuna, e te vahi repo mārô ra ei pape pihaa; e ua haaparahi oia i tei pohe i te poia i reira, ia

faan:
Salt
tanu
107:
fenu
reira
oia i
ham

te M
Mes
taat
atu
faa
tei
rato
te r
ua
ma

ma
tei
ihc
no
ma
nei
fa

ev
At
te
te

faanahonaho ratou i te tahi oire parahiraa, teie to'na i'oa, Salt Lake City, e ua ueue i te huero i taua fenua ra, e ia tanu i te ô vine ra, e ia hotu mai te maa, e ia rahi (Sal. 107: 35-37), e ua riro taua fenua ra ei fenua maitai roa, ei fenua maerehia, e rave rahi te tausani o te taata e haere i reira. E no reira, o te feia o te noaa i te paari ra, e riro oia i te haapao i teie nei mau parau, e ite hoi oia i te aroha hamani maitai o Iehova. —RUA.

Te Paeau Varua

Te parau nei te Ekalesia a Iesu Mesia i te Feia Mo'a i te Mau Mahana Hopea Nei, ua faaho'ihia te evanelia a Iesu Mesia, o tei vai moe noa i na tenetere e rave rahi, e te mau taata e uru-ore-hia i te Varua Maitai. O tei tamata a haapii atu i te parau a te taata ei mono i te parau a te Atua. Ua faafatata mai ratou i te Atua i to ratou utu, to ratou aau râ tei atea ê roa ia. E na te feia hoi i fariu ê atu i to ratou taria i te parau mau, e ua fariu mai hoi ratou i roto i te mau fabula, no te mea e mea ino roa hoi ta ratou ohipa, ua maiti ia ratou i te poiri i te maramarama, oi ite ta ratou mau ohipa ino ta ratou i rave.

E na roto i te peropheta a te Atua, ua faaite-faahou-hia mai i te evanelia nei. O taua mau parau hanahana ra, o tei tamahanahana i te mana'o no te mau feia mo'a i mutai-iho ra i tae faahou mai i te taata nei, ia ite tatou i te huru no to tatou vairaa i te paeau varua ra. I te mau tau i mairi a'e nei, ia faaite mai te hoê mau parau mau i te taata nei, ua tahitohito mai ia te mau taata o tei ore e faaroo e i farii i te reira.

Mai te au i te tau ua haere mai Iosepha Semita ma te evanelia, e i te parau ra e, ua paraparau faahou mai te Atua i te taata nei, e i horoa mai oia i te i o te evanelia, e i te parau atoa ra e, ua vai tatou pihaiho i to tatou metua i te ra'i ra. Te faaroo nei te ekalesia a Iesu Mesia, e te

HISTORIAN'S OFFICE
Church of Jesus Christ
of Latter-day Saints

haapii nei atoa hoi, ua parahi tatou atoa pihaiho i te Atua i te paeau varua, e ona hoi te metua no to tatou mau varua.

Ua haapii atu te Mesia i ta'na mau pîpî i te pure, ua na ô atura oia ia ratou, "E to matou metua i te ra'i ra." E tano hoi i te parau a Paulo i nia i teie nei parau. Na ô atura oia, "E e metua hoi to tatou to te tino nei, o te a'o mai ia tatou, e ua faaiti hoi tatou, eiaha ia rahi atu to tatou auraro i te metua o te varua nei, e ia ora'tu."

I te faaite papu atu, ua vai tatou mai te matamua roa, a taio tatou i te parau no Ioba. Na ô maira te Atua ia Ioba, no roto mai i te hoê puahi'ohi'o, "I hea oe i'au haamau i te tumu o te fenua nei? A fatu atoa i te mau fetia poipoi i te himene, e uâ pii noa te mau tamarii atoa a te Atua i te oaoa?" Ioba 38: 4-7. Na roto i teie nei para-paraauraa, e ite tatou e, ua ite hoi Ioba i teie mau uiraa; ahiri aita oia i ite, no te aha ua ui mai te Atua ia'na? Ia ite hoi tatou e mau tamarii ana'e tatou na te Atua, a taio hoi i te buka no Luka, o tei parau mai e, na Enosa, na Seta, na Adamu, na te Atua. Luk. 3: 38. E rave rahi atu â te mau paran o tei faaite mai e, ua hamani te Atua i te mau mea'toa i te paeau varua na mua ia, e na muri i te paeau tino nei. Te ite nei tatou e, e mea tia hoi ia ite i teie nei mau mea, no te mea e, ia faaineine mai ia tatou i te ao a muri atu. "E ite ra hoi tatou i te hanahana no te Atua, oia hoi te maramarama e te parau mau."

Aita nehenehe ia ora te taata i to'na mâuaraa. E ora hoi mai te au i to tatou ite e aita'tu. "No te mea i paatoa te tiaturiraa, a imi papu outou e e haapii outou ia outou iho i te parau no te paari; oia ia, a imi outou no roto mai i te mau buka i hau i te maitai i te parau no te paari; a imi i te ite na roto i te feruri-maite-raa, e na roto i te faaroo." B. F. 88: 118.—SOLONA.

"E teie nei, ia haamaitaibia te Atua, o te horoa mai i te rê no tatou, no to tatou Fatu ra no Iesu Mesia." 1 Kor. 15: 57.

Te Mau Parau Api.

I te 19 no Mati ua mairi te hoê taata i roto i te tahi farii uaina rahi i te fenua ra o Autaralia. Aita i maoro, ua pohe roa oia.

I te 17 no Mati ua haavahia te tahi pupu taata. Teie ta ratou hara, ua amu ratou i te taata, i te pae i te hitia o te râ i Afarika. I muri a'e ua ite te mau haava ê oia mau i na reira'i ratou, no reira ua taparahihia e 10 o ratou.

I te haereraa o na taata e 50 i nia iho i te e'a e tae atu ai i nia iho i te hoê pahi i te oire ra i Lonedona, ua fati te e'a no te rahi o te mau taata, e ua mairi teie nei mau taata i raro, e ua pohe roa na taata e toru, e ua pêpê roa e 40.

Ua tapeahia te hoê taata i te fare auri, o Ioane Ione te i'oa, i te oire ra o Welinito. Ua faautuahia oia e te haava, e parahi i roto i te tapearaa e ono avae i te maoro. E i muri a'era, ua paiuma oia i nia i te aua rahi, e ua haere ê atura, mai te ite-ore-hia e tae roa mai i teie nei â.

I te 18 no Mati ua eiâ te hoê taata i te mau buka no roto mai i te vairaa buka rahi i Lonedona, ia eiâ atu oia i taua mau buka ra, ua tuu oia i te tahi mau buka ei mono no te mau buka ta'na i eiâ. E no reira ia huru maoro aita hoi te mau taata haapao buka i ite, e ua riro a'e nei ta ratou mau buka maitatai, aita râ i maoro ua faaho'i mai oia i ta ratou tao'a.

I te mahana 5 no Eperera, i te oire ra o Ogedena i te fenua ra o Amerika, ua paapaa roa te hoê taata, o Pete a Oleine to'na i'oa, i te auahi, e ua pohe roa. Teie te tumu ua taero oia i te ava, e i muri iho ua haere atura oia e taoto i nia iho i te roi, e ua puhipuhi oia i te avaava i te faaea-noa-raa i nia iho i te roi, e ua ama ra te ahu taoto, e na roto i to'na taero ava, aita roa e tia ia'na ia haere i rapae i to'na piha. A hi'o tatou i te hopea o te ohipa puhipuhiraa avaava e te inuraa ava.

Ua tae mai te hoê machine i Tahiti nei, i te 27 no Eperera na niahia mai ia Mariposa. Mai teie te huru o taua machine ra: mai te hoe baero ua haamauhia e maha raau i raro a'e ei vairaa no'na, e i roto i taua machine ra e mea haapuupuuhia te raau. E te tapoi râ, ua haamauhia te hoê huira i raro a'e, e te hoê i rapae, i nia iho. E teie ta'na ohipa e rave, oia hoi e pua oia i te ahu. E iritihia te tapoi e tuuhia te ahu, e te pua, e te pape mahanahana i roto; ei reira, e tapoihia'i ia ore te mahanahana e te auauahi ia haere i rapae; ei reira, te rima o te taata e rave ai i te huira i haamauhia i rapae i nia i te tapoi a taviri ai. E na te huira i haamauhia i raro a'e i te topai ra, e horoi i te repo i nia i te ahu, e mea mâ maitai te ahu. Ei reira e iriti ai i te tapoi, a huri mai ai te ahu i rapae. E ua riro teie nei machine ei faaohieraa i te ohipa puaraa ahu e ei tautururaa i te ohipa a te mau vahine.

E 336 orometua Moromona tei te fenua Beretani i teie nei. Ua bapetizo ratou na taata e 1,234 i te matahiti i mairi a'e nei.

Ua huri roa te hoê pereoo auahi no nia mai i te mou'a i te fenua ra o Kiobamoba i te oire ra o Euadora, e ua pohe roa i na taata e 25, e ua pêpê na taata e 40.

Teie te ohipa i oti i te mau orometua Moromona o tei poro haere i te evanelia i na tufaa fenua e piti, oia hoi Switilani e Alamania: 5,612 pure-raa i haapaohia, 123,600 parapauraa evanelia, 803,539 buka iti i operehia, 14,374 buka rahi i hoochia, 607 taata i bapetizohia.

I te 23 no Febuare i te fenua ra o Alamania, ua tomo na oire e 80 i te pape rahi, no te tau toetoe rahi, ua faatoetoe te reira i te pape i roto i na anavai e piti. E no te meumeu i te pape i faatoetoehia, ua paruruhia ra te pape i roto i te pouohu. No reira, aita ravea no teie nei pape rahi, maori râ e tahe noa i nia iho i te fenua nei. Ua tomo na tâ fenua e 50,000.

Ua parauhia ra te vai nei e maha ahuru milioni iore i te fenua ra o Beritane, e ua pau ia ratou, oia hoi ua haamau'ahia ia ratou e 75,000,000 dara i te matahiti hoê nei. E no reira ua parau mai ratou e, mai te mea e ora te mau fanau'a'toa i na iore e piti, ia tae atu i na matahiti e toru, ua tae to ratou numera e 646,000 iore. E no reira te imi nei ratou i te ravea e haamou ia ratou ra.

Ua tamata te hoê taata ra no Itali e taparahi ia Teodora Rosiveleta, i te peresideni no te hau Amerika i te matahiti i mairi a'e nei, i te 30 no Mati. Ua tere atura oia i Aferika ei imi haere i te mau puaa taehae, e i to'na tere-raa'tu i nia iho i te pahi, ua tamata taua taata ra e taparahi ia'na, no reira ua paruruhia oia e te taata ia ore oia e taparahi pohe roa ia'na. Taua taparahi taata ra no te feia ia tei patoi i te mau hau, te feia toroa, e te ture fenua.

Ua haere mai te hoê pereoo auahi i te fenua ra o Canada, i te pae apatoa no Amerika, ua haere oia mai te au i na maille e 40 i te hora hoê nei. Ia haere noa ra oia ia fatata mai te hoê tapaeraa no'na ra, oia hoi i te vahi e tia i te mau taata no te pereoo auahi, e haere atu i te vahi ta ratou i hinaaro. No reira, ua haere noa mai teie nei pereoo e tae atu i te vahi tiairaa, i reira ua fati te hoê auri o tei faatere i taua pereoo ra, e i muri iho ua o'a te pereoo i te pae purumu i roto i te fare tiairaa no te mau taata, ua pohe roa e pae taata e ua pêpê na tino taata e 20.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.